

## 鼻部汇考

### 方言

#### 杂释

鼻始也兽之初生谓之鼻人之初生谓之首梁益间谓鼻为初或谓之祖祖居也

鼻祖皆始之别名也传复训以为居所谓代语者也

### 释名

#### 释形体

鼻嗜也出气嗜嗜也

#### 释疾病

鼻塞曰鼽鼽久也涕久不通遂至窒塞也

### 酉阳杂俎

#### 鼻窍通于目

东方之人鼻大窍通于目筋力属焉

### 空同子

#### 北人鼻隆

北之土厚故其人鼻隆鼻隆故北人不相鼻

### 析骨分经

#### 额

额鼻茎也属足阳明胃经

#### 鼻

鼻为肺窍鼻孔属手阳明大肠经

### 鼻部艺文

### 诗

#### 拥鼻

唐韩偓

拥鼻悲吟一向愁寒更转尽未回头绿屏无睡秋分  
簟红叶伤心月半楼却要因循添逸兴若为趋竞怆  
离忧殷勤凭仗官渠水为到西溪动钓舟

### 鼻部纪事

列子黄帝篇庖牺氏女娲氏神农氏夏后氏牛首虎  
鼻此有非人之状而有大圣之德

路史太昊伏戏氏山淮

帝禹夏后氏虎鼻

山海经一臂国人一鼻孔

史记周本纪注雒书灵听云苍帝姬昌日角鸟鼻

公羊传邾娄人执郈子用之社盖叩其鼻以血社也

神仙传老子鼻纯骨双柱

列士传干将子赤鼻

战国策魏王遗楚王美女楚王悦之夫人郑□谓新人曰王爱子美矣虽然恶子之鼻子为见王则必掩鼻子新人见王因掩其鼻王谓郑□曰新人见寡人则掩其鼻何也郑□曰其似恶闻王之臭也王曰悍哉令劓之无使逆命

庄子徐无鬼篇郢人垺漫其鼻端若蝇翼使匠石斫之匠石运斤成风听而斫之尽垺而鼻不伤郢人立不失容

战国策苏子南使于齐谓齐王曰臣闻当世之主必诛暴正乱今宋王射天笞地铸诸侯之象使侍屏偃展其臂弹其鼻此天下无道而王不伐王名终不成论衡骨相篇苏秦骨鼻为六国相

史记蔡泽传泽从唐举相唐举熟视而笑曰先生曷鼻巨肩魃颜蹙鬪吾闻圣人不相殆先生乎按注索隐曰曷鼻谓鼻如蝎虫也蹙鬪谓鼻蹙眉

秦始皇本纪秦王为人蜂准长目

高祖本纪高祖为人隆准而龙颜

汉书陈汤传建昭三年汤与甘延寿出西域单于闻汉兵至欲去复还曰不如坚守汉兵远来不能久攻单于乃被甲在楼上诸阏氏夫人数十皆以弓射外人外人射中单于鼻

三辅故事卫太子岳鼻太子来省疾至甘泉宫江充告太子勿入陛下有诏恶太子岳鼻尚以纸蔽其鼻充语武帝曰太子不欲闻陛下脓臭故蔽鼻武帝怒太子太子走还

列女传梁高行者梁之寡妇荣于色敏于行早寡不嫁梁贵人争欲娶之不能得梁王闻使聘焉乃援镜操刀以割鼻曰妾所以不死者不忍幼嗣之重孤也刑余之人殆可释矣王高其节敬其行号曰梁高行

沛国孙去病妻同郡戴元世女夫死母欲嫁之操刀割鼻刀钝不入趁于石上砺之鼻然后断郡表其阆魏志太祖纪袁绍进临官渡遣车运谷使淳于琼等将兵送之公大破琼等皆斩之注曹瞒传袁氏辎重有万余乘在故市乌巢屯军无严备公乃选精锐步骑从间道出放火尽燔其粮谷斩督将眭元进等割得将军淳于仲简鼻未死杀士卒千余人皆取鼻以示绍军将士皆怛惧时有夜得仲简将以诣麾下公谓曰何为如是仲简曰胜负自天何用为问乎公意欲不杀许攸曰明旦鉴于镜此益不忘人乃杀之管辂传辂举秀才吏部尚书何晏请之谓辂曰连梦见青蝇数十头来在鼻上驱之不肯去有何意故辂曰鼻者艮此天中之山高而不危所以长守贵今青蝇臭恶而集之焉位峻者颠轻豪者亡不可不思害盈之数盛衰之期注臣松之案相书谓鼻之所在为天中鼻有山象故曰天中之山也

曹爽传注皇甫谧列女传曰爽从弟文叔妻譙郡夏侯文宁之女名令女文叔早死居止常依爽及爽被诛文宁怜其少使人讽之女叹且泣曰吾亦惟之许之是也家以为信女于是窃入寝室以刀断鼻蒙被而卧其母呼与语不应发被视之血流满口席举家惊惶奔往视之莫不酸鼻

晋书郭舒传舒字稚行王澄闻其名引为别驾澄终日酣饮宗廡尝因酒忤澄澄怒叱左右棒廡舒厉色谓左右曰使君过醉汝辈何敢妄动澄恚曰别驾狂邪诳言我醉因遣掏其鼻舒跪而受之廡遂得免

世说王敦初尚主如口漆箱盛干枣以塞鼻

后赵录王谟字思贤鼻鼈言不清畅短无威仪将拜曲阳令石勒疑之问长史张宾宾曰请试可否勒从之谟政教严明百城尤最出为都部从事守宰去官者十五人

晋书石季龙载记石闵率赵人诛诸胡羯死者二十余万户屯聚四方者所在承闵书诛之于时高鼻多须至有滥死者

谢安传安被召历年不至禁锢终身遂栖迟东土安妻刘惔妹也既见家门富贵而安独静退乃谓曰丈夫不如此也安掩鼻曰恐不免耳安本能为洛下书生咏有鼻疾故其音浊名流爱其咏而弗能及或手掩鼻以之

世说康僧渊目深而鼻高王丞相每调之僧渊曰鼻者面之山目者面之渊山不高则不灵渊不深则不清

蜀录李雄长八尺三寸美容貌相工相之曰此君将贵其相有四目如重云鼻如飞龙口如方器耳如相望法为大贵位过三公不疑

王湛别传王处仲身长八尺龙颊大鼻

长沙耆旧传太尉刘寿少遇相师曰凡鼻为气户君鼻大贵之象

谈薮宋废帝尝入武帝庙指其画像曰渠大齯鼻如何不齯即令画工齯其鼻

魏书王慧龙传慧龙尚书仆射愉之孙也刘裕得志愉合家见诛慧龙归国初崔浩弟恬闻慧龙王氏子以女妻之浩既婚姻及见慧龙曰信王家儿也王氏世齯鼻江东谓之齯王慧龙鼻大浩曰真贵种矣数向诸公称其美

隋书元弘嗣传弘嗣转幽州总管长史于时燕荣为总管肆虐于弘嗣及荣诛死弘嗣为政酷又甚之每推鞠囚徒多以酢灌鼻

旧唐书薛举传举每破阵所获士卒皆杀之杀人多断舌割鼻

袁天纲外传天纲精于相术子客师传其父业所言亦验尝与一书生同过江登舟讫遍视舟中人颜色谓同侣曰不可渡也遂相引登岸私语曰吾视舟中数十人皆鼻下黑气大厄不久岂可从之忽见一丈夫神色高朗跛一足登舟客师乃谓侣曰可以行矣贵人在内吾辈无忧丈夫乃娄师德也

云仙杂记贺知章忽鼻出黄胶数盆医者谓饮酒之过

元载性不饮群寮百种强之辞以鼻闻酒气已醉其中一人谓可用术治之即取针挑元载鼻尖出一青虫如小蛇曰此酒魔也闻酒即畏之去此何患元载是日已饮一斗五日倍是

唐书吴少阳传少阳死元济者其长子也山首燕颌垂颐鼻长六寸

王廷凑传廷凑尝使至河阳醉寝于路有过其所者视之曰非常人也从者以告廷凑驰及之问其故曰吾见君鼻之息左若龙右若虎子孙当王百年家有大树覆及堂公兴矣及害弘正而树适庇寝自廷凑讫镕凡百年

酉阳杂俎陆绍郎中言尝记一人浸蛇酒前后杀蛇数十头一日自临瓮窥酒有物跳出啗其鼻将落视之乃蛇头骨因疮毁其鼻如劓焉

五代史王处直传处直为义武军节度使其养子名曰都甚爱之都执处直囚之西宅自为留后明年正月朔旦都拜处直于西宅处直奋起搤其胸而呼曰逆贼吾何负尔然左右无兵遂欲啗其鼻都掣袖而走处直遂见杀

闻见前录太祖微时入洛枕长寿寺大佛殿西南角柱础昼寝有藏经苑主僧见赤蛇出入帝鼻中异之帝寤僧问所向帝曰欲见柴太尉于澶州无以为资僧以钱币为献帝遂行

马自然传马湘字自然常与道士天下遍游时复以拳入鼻及出拳鼻如故

程史裕陵年十三居于濮邸一日正昼口便寝英祖忽顾问何在左右褰帐方见偃卧有紫气自鼻中出盘旋如香篆大骇亟以闻英祖笑曰勿视也

中山诗话陈文惠公喜堆墨书游长安佛寺题名从者口侧砚污鞋公性急遂窒笔于其鼻客笑失声

后山谈丛世以癩疾鼻陷为死证刘贡父晚有此疾又尝坐和苏子瞻诗罚金元佑中同为从官贡父曰前于曹州有盗夜入人家室无物但有书数卷耳盗忌空还取一卷而去乃举子所著五七言也就库家

质之主人喜事好其诗不舍手明日盗败吏取其书主人赂吏而私录之吏督之急且问其故曰吾爱其语将和之也吏曰贼诗不当和他子瞻亦曰少壮读书颇知故事孔子尝出颜仲二子行而过市而卒遇其师子路趨捷跃而升木颜渊懦缓顾无所之就市中刑人所经幢避之所谓石幢子者既去市人以贤者所至不可复以故名遂共谓避孔塔坐者绝倒

溪蛮丛笑狻猊饮不以口而以鼻名曰鼻饮

从容录南蛮有穿鼻种以金环径尺贯其鼻君长以丝系环人牵乃行其次以二花头金钉贯鼻下出

拾异志徐郎中筠少梦神人携竹篮其中皆人鼻视徐曰形相不薄但鼻曲而小吾与汝易之剽去徐鼻择一鼻安之神笑曰好一正郎鼻也徐鼻素不正自尔端直后历官正郎

元史王伯胜传伯胜兄伯顺给事内廷为世祖所亲幸因以伯胜入见命使宿卫时伯胜年十一广颡巨鼻状貌屹然帝顾谓伯顺曰此儿当胜卿可名伯胜贤奕莫尚书少虚因官西蜀谒南堂静师咨决心要堂使其向好处提撕适如口俄闻秽气以手掩鼻遂有省即呈以偈曰从来姿韵爱风流几笑时人向外求万别千差无觅处得来元在鼻尖头

#### 鼻部外编

酉阳杂俎永贞年东市百姓王布知书藏镪千万商旅多宾之有女年十四五艳丽聪悟鼻两孔各垂息肉如皂荚子其根如麻线长寸许触之痛入心髓其父破钱数百万治之不瘥忽一日有梵僧乞食因问布知君女有异疾可一见吾能止之布被问大喜即见其女僧乃取药色正白吹其鼻中少顷摘去之出少黄水都无所苦布赏之白金梵僧曰吾修道之人不受厚施唯乞此息肉遂珍重而去行疾如飞布亦意其贤圣也计僧去五六坊复有一少年美如冠玉骑白马遂扣门曰适有胡僧到无布遽延入具述胡僧事其人吁嗟不悦曰马小踠促竟后此僧布惊异诘其故曰上帝失乐神二人近知藏于君女鼻中我

天人也奉帝命来取不意此僧先取之吾当获谴矣  
布方作礼举首而失

新罗国有第一贵族金哥其远祖名旁有弟一人  
甚愚入山遇群鬼执之谓曰尔欲为我筑糠三版乎  
尔欲鼻长一丈乎请筑糠三版三日饥困不成求哀  
于鬼乃拔其鼻鼻如象而归国人怪而聚观之惭恚  
而卒

### 鼻部杂录

诗经邶风终风篇寤言不寐愿言则嚏按注嚏歔嚏  
也人气感伤闭郁又为风雾所袭也

礼记月令秋行夏令则人多歔嚏

内则在父母舅姑之所不敢啜嚏嚏咳

列子仲尼篇鼻将窒者先觉焦朽

论衡鼻不知臭为鼯人不知是非为闭

说文洩鼻液也

养生经鼻者心之门

崔寔政论秦割国之君剽杀其民于是赭衣塞路有  
鼻者丑故百姓鸟惊兽骇不知所归命

抱朴子酒诫篇鼻之所喜不可任也惑鼻者必口蕙  
芬馥也

博物志西方少阴日月所入其土窈冥其人高鼻

真诰鼻中隔之际名曰山源山源者一名鬼井一名  
神池一名邪根一名魂台也

酉阳杂俎身神及诸神名异者脑神曰觉元发神曰  
元华目神曰虚监鼻神曰冲龙舌神曰始梁

笔录范鲁公质尝谓同列曰人能鼻吸三斗醇醋即  
可为宰相矣

医间漫记谢元吉言人看圣贤之书当如看相书然  
乃有益人观相书如言鼻高隆耶低折耶高隆则喜  
不然则忧矣